

d' eerste off wesen zal, ende dat naer vuytwijzen die tauxatie bij de tauxateurs van de vroetschap geordonneert daer van gedaen, bedraegende die somme van tweeveertich carolus guldens van xl groten vlaens 'tstuck. Des t' oirconde zoe hebben wij Burgermeesteren voirn. 'tzege ten saecken der voirz. stede hier beneden angedruet, opten viij Junij anno xvc drie ende tzeventich. (1)

L. Coren Scs.

(1) Ook op de achterzijde van dit stuk zijn de ontvangene termijnen aangeteckend.

XXIX.

Brief van Prins Willem van Oranje aan de regering van Alkmaar. De Prins stelt die van Alkmaar gerust over het vertrek van eenige knechten uit het leger van Alkmaar naar den Diemerdijk en verzoekt hen met de fortificatie hunner stad voort te gaan. (*Archief van Alkmaar.*)

Die Prince van Oraengien Grave van Nasfau
Heere ende Baron van Breda, van Diest, enz.

Eersaeme, wijse, lieve, besondere! Uwen brief voorghysteren aen ons gheschreven hebben wij alhier op ghysteren ontfanghen en daerbij ghesien, dat ghij u een weynich verslaeghen hebt, overmidts dat noch ettelycke knechten vuyt het lagher van Egmond naer den Dimmerdijck vertoghen zijn. Maer alsoe 't selve tot meerder verzeckerheyte van denselven dijcke, daer desen gheheelen lande soo veele aens leydt, gheschiedt is ende dat wij wel weten, dat ghij sulcx nyet en soudet willen verhinderen: soo verhoepen wij oock, dat ghij 'tselve nyet soo vreempt vinden en sult, ende houdende middelertijt in de stede van Alckemaer goede scherpe wachte. Verhoepende wij wel, dat de vyandt elders soo veele wercx becomen zal, dat ghij des te min noot van hem hebben zult, soo begheeren wij, dat ghij des nyet te min met de fortificatie der voorn. stede voorts vaert.

Ende wij hebben order ghestelt, dat de dorpluyden de contributie te dien eynde geordonneert opbrengghen ende betaelen sullen. Waertoe ghij deselve sult moeghen bedwingen ende constringeren, u te dien eynde aucthorizerende bij desen ende voor zoo veele ghij begheert, dat wij den Heere van Boysott wederomme bij ulieden wilden seynden, souden wij 't selve gaerne doen; maer alsoe wij hem alhier noch ter tijd grootelyck van noode hebben en weet nyet moghelijk, dat hij soe haest derwaerts reyse, hoewel wij nyet laeten en willen hem ter eerster ghelegentheit bij ulieden te schicken.

Eersaeme, wijse, lieve besondere! Onse Heere Godt zij met u. Geschreven tot Leyden opten x dach Junii anno 1573.

U lieder goede vrintd

Guille de Nassau.

N. Brunynck.

Aen eersaeme, wijsen, onsen lieven
besunderen Burgermeesters ende Re-
geerders. der stede van Alckemaer.

XXX.

Brief van D. Sonoy aan de regering van Alkmaar. Hij berigt aan die van Alkmaar den ontvangst van den toegezonden goteling en verzoekt hen ook de lade van dezen te zenden. (*Archief van Alkmaar.*)

Heeren Burgermeesters! Ick heb u brief ontfangen ende daer beneffens het goteling, maer verwondert mij zeer, dat ghij die laede (1) daertoe nyet gesonden en hebt, begeer daeromme, dat ghij nyet laeten en wilt in alle ijlle die laede daertoe te senden. Hier met Godt bevolen,

(1) *Laede* waarschijnlijk het roopaard of rolpaard, d. i. het affuit of de geschutwagen.